

'Un Dia Den Bida' ta yega na su prome lustro di existencia

ORANJESTAD - Un dia Den Bida ta cumpli cinco aña stret riba TV. Tur cos a cuminsa den luna di maart di aña 2002 ora cu e prome edicion di un programa cu un concepto diferente ta wordo estrena riba pantaya di nos planta nacional TeleAruba yama "Un Dia Den Bida".

Cu aprobacion di Ito Tromp y Anton Bernabella a dicidi di pone filmacion y edicion completamente den man di Sky TV, cu tabata e unico compania cu a kere den e proyecto innovativo aki.

Hopi tabata esnan cu a puntra nan mes ta kico Poentje a bai haci TV y ta kico e sa di e mundo tan dificil aki, sin a tuma nan tempo pa sinta wak un di e edicionan cu tabata tur diarazon (e tempo ei) den aire. Poco poco tur e personanan aki a bin ta guli nan palabranan y cambia nan pensamento y cuminsa na observa e programa y e presentando di un otro angulo.

Poentje ta conta nos redaccion cu no tabata y ainda no ta un caminda niun tiki facil, pero manera cu su defunto mama semper a bisa, ora cu bo ta haci bon, e bon ta bin semper pa bo bek y e keyword to success ta y lo keda den e mundo di TV "consistency" kier men consistencia y trata semper pa tur siman tin un

programa den aire, aunke cu ta un repiticion.

E prome dos añanan Poentje a combina su trabou diario cu filmacionan, pero despues di un diferencia di opinion cu Ennia, e presentado Arubiano ta dicidi cu ta tempo pa e aleha for di e mundo di seguro y dedica tur su tempo na su programa cu ta dunando su frutonan. Tabata sigur nuebe luna dificil financieramente y cu aporte di su señora, poco poco Poentje tabata mira luz na horizonte.

Tres aña ta pasa y e mesun hendenan ta sigui puntra nan mes si topiconan nobo pa e programa, no ta yegando na su fin. Riba dje e programa aki cu ya tur hende ta papiando di dje ta cruza frontera na fin di aña 2005 y cuminsa pasa na Corsow riba pantayanan di TeleCuracao tur dialuna pa 7'or anochi.

Awe nos por mira atras riba un di e programanan di TV cu a demostra y keto bai ta demostrando e importancia di e existencia di sernan humano cu:

1. Nunca a pensa cu nan lo ta na TV como invitado principal contando nan bida.
2. Nunca por a kere cu nan lo bai papia asina abiertamente riba nan pasado y dolornan cu nan a of ainda ta experienciando den nan bida.

"Mi mes no tabata sa cu mi tin e don aki.." Poentje ta sigui conta, pero ta un hecho cu despues di 10 minuut combersando cu mi invitado cu mayoria bes ta sinti su mes incomodo y nervioso, pa motibo di e luznan cayente y fuerte riba nan cabez y e tres camera constantemente dirigi riba nan, ta bai den un calmo y bin sinti nan completamente na cas y semper ta lubida mes cu ta den un studio nan ta of hasta cu ta un filmacion over di nan bida ta tumando luga.


Tabatin un aña cu mester a hala faha mara y busca un otro compania, e tempo ei Morris Production (productur di Mundo di Baby), pa edita e programanan pero lagando e filmacionan den man di



Sky TV. Ta yega asina leu cu Poentje ta duna Sky TV un man y ta bai full cu Morris Production y hunto tambe nan ta produci pa un aña completo e programa di lama "Compas", cu ta stop pa motibonan financiero.

Pa por economiza mas ainda, ya cu ta bon conosi cu television no ta barata y riba dje Un Dia Den Bida a cai den un atraso di pago di miles di Florin cu e Tele Aruba bieu di e tempo ei, Poentje ta muda bai cu BinIt Studios y ta yega na un areglo di pago cu Tele Aruba. Ta drenta e noticia cu Tele Aruba ta sera pa transmisionnan normal, pero por a yega na e areglo cu e futuro Tele Aruba nobo, cu tur diaranson y diadomingo lo stop CNN, pa transmiti "Un Dia Den Bida".

Cu Tele Aruba nobo tambe e atraso di pago ta keda un problema grandi y hunto cu



director di Tele Aruba ta hinca un afbetallinsregeling hopi favorable pa e programa di TV tan gusta aki.

Dios gracias awe dia pa mas di un aña caba e debe a baha te na cero y Tele Aruba ta semi-partner den programa di TV. Ta bon pa agrega cu na Corsow si semper TeleCuracao tabata partner mayoritario di e programa y awe ta goza di un sintonia barbaro na Corsow, Boneiro y Sint Maarten.

Un Dia den Bida tin su luga den curazon di tur esnan cu ta sigui e programa semanal aki cu ya pa e ultimo dos añanan a muda di diarazon pa diahuebs anochi 9'or despues di lotto. Produccion, edicion y benta pa e ultimo dos añanan, ta completamente bou di encargo di Poentje Castro mes y filmacionan ta wordo realiza na Aruba dor di TeleAruba y na Corsow dor di e ekipo di TeleCuracao.

No claro cu mi no tin pensa di stop pa awor aki, Poentje ta agrega, esaki claro si Dios duna mi semper e forza y bida di por sigui haci loke cu berdaderamente mas mi gusta

y esei ta hiba e experiencia buntia, bon, malo of amargo di bida di personanan, di cual nos tur por siña algo di dje.

Mi kier a gradici cada un invitado cu mi a presenta den mi programa, pa nan amabilidad, bondad, sinceridad, transparencia, humildad, corahe y sigur pa por a mostra na un manera diferente cu nan tin derecho di existencia y atencion di otro sernan humano. Sigur mi kier a gradici tambe tur instancianan, companianan, medionan di comunicacion of personanan cu a colabora den un of otro modo y cu a duna nan aporte sea ta moral o financiero na mi programa of invitado.

Na tur mi patrocinadornan exclusivo cu for di prome dia di existencia ta cu mi programa, pasobra simplemente nan a kere den mi como persona y den mi proyecto cu no a caba ainda.

Last but surly not least, Aruba su poblacion completo pa a haci "Un Dia Den Bida" nan programa di TV preveri. Danki!

